

四庫全書

史部

欽定四庫全書

史部

元和郡縣志卷十六

詳校官編修

臣

曹

誠

檢討

臣

德生覆勘

總校官庶吉士

臣倉聖脉

校對官中書

臣范來宗

謄錄監生

臣江

晉

欽定四庫全書

元和郡縣志卷十六

唐李吉甫撰

河南道三

太原府

并州

開元戶十二萬六千八百四十
元和戶十二萬四千

鄉二百四十五
鄉二百四十九

今為河東節度使理所

管太原府汾州沁州儀州
嵐州石州忻州代州蔚州

朔州雲州

管縣四十七

都管戶十五萬一千

六百八十三

禹貢冀州之域禹貢曰既修太原注曰高平曰原今以
為郡名舜典曰肇十有二州王肅注曰舜為冀州之北
太廣分置并州至夏復為九州省并州合于冀州周之
九州復置并州職方曰正北曰并州其山鎮曰恒山數
曰昭餘祁川曰滹沱漚夷浸曰涑易釋名曰并兼也言
其州或并或設因以為名春秋晉荀吳敗狄于大鹵即
太原晉陽縣也中國曰太原夷狄曰大鹵按晉太原大
鹵大夏夏墟平陽晉陽六名其實一也太康地記曰并

州不以衡水為號又不以恒山為名而言并者蓋以其
在兩谷之間乎按今州本高辛氏之子實沈又金天氏
之子臺駘之所居也左傳曰昔高辛氏有二子伯曰閼
伯季曰實沈居于大林不相能也日尋干戈后帝不臧
遷實沈于大夏主參金天氏有裔子曰昧為玄冥師生
允格臺駘以處太原晉陽縣也太原臺駘之所居按今
州又為唐國帝堯為唐侯所封又為夏禹之所都也帝
王世紀曰帝堯始封于唐又徙晉陽及為天子都平陽

平陽即今晉州晉陽即今太原也又曰禹自安邑都晉陽至桀徙都安邑至周成王以封弟叔虞是為晉侯史記曰成王與叔虞戲削桐葉為圭曰以是封汝周公請封之于唐成王曰吾戲耳周公曰天子無戲言遂以封之今州春秋時為晉國戰國時為趙地左傳曰晉趙鞅入晉陽以叛潁容曰

潁容著春秋左氏條例見後漢書儒林傳舊訛寫潁容今改正

趙簡子居晉陽至成公居邯鄲史記曰智伯率韓魏攻趙襄子奔保晉陽晉為韓魏趙所滅故其地屬趙地理

志曰趙西有太原秦本紀曰莊襄王二年蒙驁攻趙定
太原四年初置太原郡始皇置三十六郡仍為太原郡
漢二年魏豹反為楚盡有太原上黨之地九月韓信虜
魏豹定魏地置河東上黨太原郡六年以太原二十一
縣為韓國徙封韓王信都太原七年信反走入匈奴十
一年封皇子為代王都晉陽文帝元年立皇子參為太
原王都晉陽地理志云太原郡領二十一縣屬并州後
漢末省并州入冀州魏文帝黃初元年復置并州改太

原郡為太原國初曹公圍袁尚于鄴時袁紹外甥高幹為并州刺史沮授說幹曰并州左有恒山之險右有大河之固北有強胡宜速迎尚并力觀變幹不能用故敗晉惠帝時并州之地盡為劉元海所有其後劉曜徙都長安自平陽以東盡入石勒至苻堅姚興赫連勃勃並于河東郡置并州後苻丕為慕容垂所迫奔于晉陽稱帝一年為慕容永所滅後魏復為太原郡周武帝建德六年平齊置六府于并州後省六府置并州總管隋開

皇二年廢總管置河北道行臺尚書省今州理是也九年廢行臺復置并州總管大業元年廢總管三年罷州為太原郡隋季陵遲寇盜充斥煬帝以高祖為山西河東道撫慰大使太原郡留守仍遣武賁郎將王威高君雅為副時賊帥歷山飛衆號十萬來寇郡境劉武周又殺太守王仁恭舉兵馬邑俄又攻破汾陽宮監裴寂晉陽令劉文靜勸高祖舉兵旬日間衆至數萬威君雅有疑心高祖斬之以徇時大業十三年也其年入關克定

京邑高祖輔政義寧元年太原郡仍舊不改武德元年
罷郡為并州總管三年廢總管四年又置其年又改為
上總管五年又改為大總管七年又改為大都督天授
元年罷都督府置北都神龍元年依舊為并州大都督
府開元十一年玄宗行幸至此州以王業所興又建北
都改并州為太原府立起義堂碑以紀其事二十一年
分天下州郡為十五道置採訪使以檢察非法太原為
河東道又于邊境置節度使以武遏四夷河東最為天

下雄鎮

河東節度理太原府管兵五萬五千人馬一萬四千匹衣賜一百二十六萬匹段軍糧五十萬

石倚角朔方天兵軍

太原府城內聖厯二年置管兵二萬人馬九千五百匹

雲中

郡守捉

東南去單于府二百七十里調露中裴行儉破突厥置管兵七千七百人馬一千二百匹東南

去理所八

大同軍

雁門郡北三百里調露中突厥南侵裴行儉開置管兵九千五百人馬五

百餘里雁門今代州也

橫野軍

安邊郡東北百四十里開元中河東公張

嘉貞移置管兵七千八百人馬千八百匹

定襄郡

去理

西南去理所九百餘里安邊郡今蔚州

雁門郡

去理所五百里

樓煩郡

去理

八十里管兵三千人定襄郡今忻州

所二百五十里管兵三千人樓煩郡今嵐州

倚嵐軍

樓煩郡北百里長安中李迥秀置管兵千人東

南去理所三百五十里寄音智

天寶元年改北都為北京今太原有三

城府及晉陽縣在西城太原縣在東城汾水貫中城南

流

府境

案府境里數傳寫缺

八到

西南至上都一千二百六十里
南至東都八百九十里

東至趙州五百六十里

東南至儀州三百四十五里

正南微東至潞州四百五十里

西南至沁州三百四十里

北至忻州一百八十里

東北至恒州五百里

貢賦

開元貢

甘草 龍骨 特生草 銅鏡
黃石 鉶 人參 柏子仁 蒲萄

賦 布 麻

管縣十三

太原 晉陽 榆次 清源 壽陽 太谷

祁 文水 交城 廣陽 陽曲 孟

樂平

太原縣

赤郭下

開元戶二萬一千六百五十六 鄉四十
案前各府州有戶鄉數而各縣皆無自此以下各

縣有開元戶鄉而不及元和後仍有併開元不載者決非斯志原本參差蓋皆由傳寫遺缺

本漢晉陽縣地高齊河清四年自今州城中移晉陽縣于汾水東隋文帝開皇十年移晉陽縣于州城中仍于其處置太原縣屬并州大業三年罷州置太原郡縣仍屬焉隋末移入州城貞觀十二年還遷于舊理在州東二里百六十步

牢山一名看山在縣東北四十五里後魏書曰劉聰遣子粲襲晉陽倚盧救之遂獵牢山陳閱皮肉山為之赤

其山出金鉶

潛丘在縣南三里爾雅曰晉有潛丘隋開皇二年于其上置大興國觀

洞過水東自榆次縣界流入西去縣三十里入晉陽縣界

陽曲故城在縣東北四十五里

陽直故城在縣東北二十里隋開皇十六年改陽曲縣理此

晉渠在縣西一里西自晉陽縣界流入汾東地多鹽鹵井不堪食貞觀十三年長史英國公李勣乃于汾河之上引決晉渠厯縣經鄠又西流入汾水

晉陽縣

赤郭下

開元戶一萬二千八百八十一 鄉二十五

本漢舊縣也屬太原郡至後魏並不改按此前晉陽縣理州城中高齊武成帝河清四年移晉陽縣于汾水東今太原縣理是也武平六年于今理置龍山縣屬太原

郡因縣西龍山以為名也隋開皇三年罷郡置并州十年廢龍山縣移晉陽縣理之十六年又置清源縣大業三年省入罷州為太原郡縣仍屬焉皇朝因之在州南二里懸甕山一名龍山在縣西南十二里山海經曰懸甕之山晉水出焉其上多玉其下多銅

蒙山在縣西北十里十六國春秋曰前趙劉聰征劉琨不克略晉陽之人踰蒙山而歸即謂此也今山上有楊忠碑為周將討齊戰勝隋開皇二年追紀功烈始建此

碑忠即文帝之考諡曰武元皇帝

汾水北自陽曲縣界流入經縣東二里又西南入清源縣界

晉水源出縣西南懸甕山水經注曰晉水出懸甕山東過其縣南昔智伯遏晉水灌晉陽城不沒者三版後人踵其遺跡蓄以為沼沼水分為二派其北瀆即智氏故渠也其瀆乘高東北注入晉陽城以周灌漑東南出城注于汾水其南瀆于石塘下伏流東南出晉陽城南又

東南入于汾今按晉水初泉出處砌石為塘自塘東分為三派其北一派名智伯渠東北流入州城中出城入汾水其次派東流經晉澤南又東流入汾水此二派即酈道元所言分為二派者也其南派隋開皇四年開東南流入汾水

洞過水東自太原縣界流入西入于汾晉水下口也水經注曰劉琨之為并州也劉元海引兵邀擊之合戰于洞過即是水也今按此水出沾縣北山沾即今樂平縣

也水經縣西南二十五里入汾水

晉澤在縣西南六里隋開皇六年引晉水溉稻田周迴
四十一里

府城故老傳晉并州刺史劉琨築今按城高四丈周迴
二十七里城中又有三城其一曰大明城即古晉陽城
也左傳言董安于所築史記云智伯攻襄子于晉陽引
汾水灌其城城不浸者三版春秋後語云智伯攻晉陽
決晉水灌之城中懸釜而炊今按城東有汾水南流城

西又有晉水入城而史記云引汾水後語云決晉水二

家不同未詳孰是

索史記趙世家作引汾水韓世家亦作決晉水

高齊後帝于

此置大明宮因名大明城姚最序行記曰晉陽宮西南

有小城內有殿號大明宮即此也城高四丈周迴四里

又一城南面因大明城西面連倉城北面因州城東魏

孝靜帝于此置晉陽宮隋文帝更名新城煬帝更置晉

陽宮城高四丈周迴七里又一城東面連新城西面北

面因州城開皇十六年築今名倉城高四丈周迴八里

故唐城在縣北二里堯所築唐叔虞之子變父徙都之所也

三角城在縣西北十九里一名徒人城

捍胡城一名看胡城在縣北二十三里

受瑞壇在州理倉城中義旗初高祖神堯皇帝受瑞石于此壇文曰李理萬吉

晉陽故宮一名大明宮在州城內今名大明城是也昔智伯攻趙襄子襄子謂張孟談曰無箭奈何對曰臣聞

董安于簡主之才臣也理晉陽公宮之垣皆以藝蒿楷
牆之蒿至于丈于是發而試之其堅則菌簠之勁不能
過也公曰矢足矣吾銅少對曰臣聞董安于之理晉陽
公宮之室皆以鍊銅為柱質請發而用之則有餘銅矣
高齊文宣帝又于城中置大明宮

竹馬府在州城中

汾橋架汾水在縣東一里即豫讓欲刺趙襄子伏于橋
下襄子解衣之處橋長七十五步廣六丈四尺

晉祠一名王祠周唐叔虞祠也在縣西南十二里水經注曰昔智伯遏晉水以灌晉陽其川上滄後人蓄以為沼沼西際山枕水有唐叔虞祠水側有涼堂結飛梁于水上晉川之中最為勝處序行記曰高洋天保中大起樓觀穿築池塘自洋以下皆遊集焉至今為北都之勝介之推祠在縣東五十里

唐叔虞墓在縣西南十六里

高齊相國咸陽王斛律金墓在縣西南十七里

晉祠碑在乾陽門街貞觀二十二年太宗幸并州所置
御製并書

起義堂碑在乾陽門街開元十一年玄宗幸太原所立
御製并書

講武臺在縣西北十五里顯慶五年置

榆次縣 畿西去府五十六里

開元戶一萬五千四百三十七 鄉三十

本漢舊縣即春秋時晉魏榆地左傳曰石言于晉魏榆

注曰魏晉邑榆卽州理名也史記曰莊襄王二年使蒙
驚攻趙魏榆漢以為縣屬太原郡後魏太武帝并入晉
陽縣宣武帝復置榆次縣高齊文宣帝省自今縣東十
里移中都縣理之屬太原郡十年改中都縣又為榆次
縣三年罷州為郡縣仍屬焉皇朝因之

麓臺山俗名鑿臺山在縣東南三十五里

洞過水東自壽陽縣界流入經縣南四里又西南入太
原縣界

中都故城縣東十里高齊移于廢榆次城即今縣理是也

鑿臺在縣南四里水經注曰洞過水西過榆次縣南水側有鑿臺智伯瑤刳腹絕腸折頸摺頤之處史記曰智氏信韓魏從而伐趙攻晉陽韓魏殺之于鑿臺之下說苑曰智氏見伐趙之利不知榆次之禍皆謂此也今按其臺為洞過水所侵無復遺跡

原過祠俗名原公祠在縣東九里史記曰智伯率韓魏

攻趙趙襄子懼乃奔保晉陽原過從後至于王澤見三人自帶以上可見自帶以下不可見與原過竹三節莫通曰為我遺趙毋卹原過既至以告襄子襄子齋三日親自剖竹有朱書曰趙毋卹余霍泰山山陽侯天使也三月丙戌余將使汝反滅智氏汝亦立我百邑襄子再拜受三神之令既滅智氏遂祠三神于百邑使原過主之

麓臺山祠俗名智伯祠在麓臺山上

清源縣

畿東北至府三十九里

開元戶八千五百四十一

鄉十七

本漢榆次縣地理志曰榆次有梗陽鄉魏戊邑按梗陽
在今縣南百二十步梗陽故城是也自漢晉皆為榆次
縣地後魏省榆次縣地屬晉陽隋開皇十六年于梗陽
故城置清源縣屬并州因縣西清源水為名大業二年
省又為晉陽縣地武德元年重置

汾水經縣東去縣九里又東南入汾水縣界

梗陽故縣城春秋晉大夫祁氏邑也在縣南百二十步
左傳曰晉殺祁盈遂滅祁氏分為七縣魏戌為梗陽大
夫是也隋開皇十六年于其城內置清源縣

鵝城在縣東南二十二里晉陽春秋曰永嘉元年洛陽
步廣里地陷有二鵝色黃蒼者飛沖天白者不能飛蒼
雜色故夷之象劉曜以為己瑞築此城以應之

閻沒墓在縣西南三里左傳曰梗陽人有獄魏戌不能
斷以獄上其大宗賂以女樂魏子將受之魏戌謂閻沒

必諫許諾退朝待于庭饋入召之比置三歎魏子問之
對曰或賜小人酒不夕食饋始至恐不足中置自咎曰
豈將軍食之而有不足及饋之畢願以小人之腹為君
子之心屬饜而已魏子辭梗陽人

壽陽縣

畿西南至府一百五十里

開元戶五千一百六十七

鄉十

本漢榆次縣地西晉于此置受陽縣屬樂平郡永嘉後
省晉末山戎內侵後魏太武帝遷戎外出徙受陽之戶

于太陵城南置受陽縣屬太原郡受陽縣即今文水縣是也隋開皇十年改受陽為文水縣又于受陽故城別置受陽縣屬并州即今縣是也大業三年罷州為太原郡縣仍屬焉武德三年置受州縣改屬焉貞觀八年廢受州縣屬并州十一年更名壽陽

方山在縣北四十里

洞過水東自樂平縣界流入在縣南五十里又西南入榆次縣界

馬首故城在縣東南十五里左傳曰晉分祁氏之田為七縣韓固為馬首大夫即其地也

神武故城後魏神武郡也在縣北三十里周廢

太谷縣

畿西北至府七十五里

開元戶一萬五百九十 鄉二十

本漢陽邑縣地屬太原郡今縣東十五里陽邑故城是也後漢明帝以馮魴為陽邑侯後魏太武帝省景明二年復置陽邑縣屬太原郡即今縣是也高齊及周同隋

開皇三年罷郡屬并州十八年改陽邑為太谷縣因縣
西太谷為名大業三年罷州為太原郡縣仍屬焉武德
三年分并州之太谷祁二縣于此置泰州六年省泰州
復以太谷祁縣屬并州

白壁嶺在縣北七十五里

蔣谷水今名象谷水源出縣東南象谷經縣北四里北
入清源縣界

陽邑故城在縣東南十五里

咸陽故城在縣西南十里秦伐趙築之以咸陽兵戍之
因名

蘿摩亭俗名落漠城在縣西北十九里

祁縣 畿北至府一百里

開元戶一萬五千七百八十二 鄉三十

本漢舊縣即春秋時晉大夫祁奚之邑也左傳曰晉殺
祁盈遂滅祁氏分為七縣以賈辛為祁大夫注曰太原
祁縣也按漢祁縣在東南五里故祁城是也後漢迄後

魏並不改高齊天保七年省隋開皇十年重置屬并州
武德二年改屬秦州六年省秦州還屬并州

積山在縣東南六十里

胡甲水一名太谷水東南自潞州武鄉縣界流入又南
入汾州平遙縣界

故祁城漢祁縣城也在縣東南五里晉大夫賈辛邑水
經注曰賈辛以貌醜妻不為言與之如臯射雉中之妻
乃笑按左傳魏獻子謂賈辛曰昔賈大夫惡取妻而美

三年不言御以如臯射雉獲之其妻始笑而言注曰賈國之大夫以此而言則辛非射雉者酈道元所引為謬趙襄子城在縣西六里

雲州故城後魏雲州城也在縣西二十里孝武帝永熙中寄理并州界謂此也

祁奚墓在縣東南七里

後漢溫序墓在縣西北十四里序本祁人死葬洛陽其子夢序云久客思故鄉乃反葬焉

後漢周黨墓在縣東南十四里黨廣武人世祖引見伏而不謁

高齊唐邕墓在縣東南七十里碑云齊尚書令晉昌王

文水縣

畿東北至府一百一十里

開元戶一萬二千六百六 鄉二十三

本漢大陵縣地屬太原郡今縣東北十三里大陵故城是也後魏省仍于今理置受陽縣屬太原郡隋開皇十年改受陽縣為文水縣因縣西文谷水為名皇朝因之

天授元年改為武興縣神龍元年復為文水縣城甚寬
大約三十里百姓于城中種水田

汾水東北自清涼縣界流入經縣東十五里又西南入
汾州隰城縣界

文水西北自交城縣界流入經縣西又南入隰城縣界
大陵城漢大陵縣也在縣東北十里史記曰趙武靈王
游大陵夢處女鼓琴而歌異日數言所夢想見其狀吳
廣聞之因進孟姚焉

平陶城漢平陶縣城也在縣西南二十五里屬太原郡
後魏改為平遙縣後西胡內侵遷居京陵塞在今汾州
界

大于城在縣西南十一里本劉元海築令兄延年鎮之
胡語長兄為大于因以為名

交城縣 畿東北至府八十里

開元戶五千四百十三 鄉十二

本漢晉陽縣地隋開皇十六年分晉陽縣置交城縣取

古交城為名屬并州皇朝因之天授二年長史王及善
自山北故交城縣移就卻波村置

少陽山在縣西南九十五里其上多玉其下多赤銀高
二百丈周迴二十里

羊腸山在縣東南五十三里石磴縈委若羊腸後魏于
此立倉今嶺上有故石墟俗云太武帝避暑之所地理
志上黨壺關亦有羊腸陂在今潞州界不謂此也

狐突山縣西南五十里出鐵鉞

汾水西北自嵐州靜樂縣界流入

文谷水出縣西南文谷水經曰文水出大陵縣西山文谷按大陵縣在今文水縣北十三里大陵故城是也文水發源此城西北東南流入文水縣行八十里

廣陽縣

畿西至府二百六十里

開元戶二千六百七十三

鄉五

本漢上艾縣也屬太原郡後漢屬常山國晉屬樂平郡後魏改石艾縣屬樂平郡不改隋開皇三年罷郡改屬

遼州大業三年省遼州後屬并州武德三年又屬遼州
遼州今太原府樂平縣理是也六年改屬受州貞觀八
年廢受州後屬并州天寶元年改為廣陽縣因縣西南
八十里廣陽故城為名也

浮山在縣東南三十五里

澤發水一名阜漿水亦名妬女泉源出縣東北董卓壘
東今其泉初出大如車輪水色青碧泉傍有祠土人祀
之婦人衽服靚妝必興雷電故曰妬女故老傳此泉中

有神似鼈晝伏夜遊神出水隨神而涌其水東北流入井陘縣界

廢受州城在縣西北三十里舊名塞魚城武德八年因故跡築移受州理此貞觀八年廢

井陘故關在縣東八十里史記曰漢二年韓信與張耳欲東下井陘擊趙王成安君陳餘聚兵井陘口二十萬廣武君李左車說成安君曰井陘道狹車不得方軌騎不得成列假臣奇兵三萬從間道絕其輜重不至十日

兩將之頭可致戲下餘不從故敗今按井陘亦名土門
盤石故關在縣東北七十里

葦澤故關在縣東北八十里

董卓壘在縣東北八十里水經注曰澤發水出董卓壘
東

妒女祠在縣東北九十里澤發水源

陽曲縣

畿南至府七十里

開元戶八千一百二十二 鄉十六

本漢舊縣也屬太原郡黃河千里一曲曲當其陽故曰陽曲按此前陽曲縣今忻州定襄縣是也後漢末移太原縣北四十五里陽曲故城是也後魏又移于今縣南四里陽直故城隋開皇三年改為陽直縣十年又移于今縣東北四十里汾陽故縣十六年改陽直縣為汾陽縣因漢舊名也煬帝又改為陽直縣移理木井城即今縣理是也武德三年又移于今縣西十五里分置汾陽縣屬并州七年省陽直縣改汾陽為陽曲縣因漢舊縣

也

方山在縣東六十里

汾水西自交城縣流入經縣西南去縣三十里又東南入太原縣界

縣城故木井城也東魏孝靜帝築城中有井以木為甃因名之

狼孟故城在縣東北三十六里史記曰始皇十五年大興兵至太原取狼孟是也漢以為縣屬太原郡晉末省

按城左右狹澗幽深南面大壑謂之狼馬澗舊斷澗為城今餘壁猶存

故孟城漢孟縣也本春秋時晉大夫祁氏邑在縣東北十里左傳曰晉殺祁盈遂滅祁氏分為七縣以孟景為孟大夫漢以為縣

石嶺鎮在縣東北七十里

孟縣 畿西南至府二百二十里

開元戶五千二百七十六 鄉十

本漢舊縣屬太原郡後漢及晉不改按此前孟縣在今縣西南陽曲縣東北八十里故孟縣城是也後魏省地屬石艾縣隋開皇十六年分石艾縣置原仇縣屬遼州因原仇故城為名即今縣是大業二年改原仇為孟縣因漢舊名屬并州皇朝因之武德三年割并州之孟壽陽二縣于此置受州貞觀八年省受州孟縣復屬并州

白馬山在縣東北六十里山海經曰白馬之山其陽多

玉石其陰多鐵及赤銅木馬之水出焉山上有白馬關
後魏所置

原仇山在縣北三十里出人參鐵鉶縣取此山為名
滹沱水西自代州五臺縣界流入南去縣百里

縣城本名原仇城亦名仇由城按韓子曰智伯欲伐仇
由國道難不通鑄大鐘遺之仇由大悅除塗將內之赤
章曼支諫不聽斷轂而馳仇由以亡蓋其地也

樂平縣

畿西南至府三百里

開元戶二千六百八十九 鄉五

本漢沾縣屬上黨郡

沾音丁
念反

晉于此置樂平郡沾縣屬

焉又別置樂平縣後魏太武帝省樂平郡及縣孝明帝
于今儀州和順縣重置樂平郡及縣高齊移理沾城即
今縣是也隋開皇十六年于此置遼州縣屬焉大業二
年省遼州以樂平屬并州皇朝因之武德六年屬受州
貞觀八年省受州縣改屬并州

少山一名河逢山在縣西南三十里福地記曰河逢山

在樂平沾縣高八百丈可避兵水此即恒山之佐命也
沾嶺在縣西三十里

清漳水出縣西南少山山海經曰少山清漳水出焉今
按清漳出樂平濁漳出潞州長子縣界

縣城即漢沾縣城也隋文帝更加修築

昔陽故城一名夕陽城在縣東五十里左傳曰晉荀吳
假道于鮮虞遂入昔陽滅肥子綿臯歸七國時趙戍于
此

元和郡縣志卷十六

欽定四庫全書

元和郡縣志卷十七

唐 李吉甫 撰

河東道 四

汾州 西河望

開元戶五萬三千七十六 鄉一百一十四
元和戶八千三百四 鄉一百一十八

禹貢冀州之域其在虞舜十二州及周皆屬并州春秋時為晉地後屬魏謂之西河子夏居西河吳起為西河

守皆謂此也秦屬太原郡漢武帝元朔四年置西河郡
領縣三十六理富昌縣是也後漢徙理離石即今石州
離石縣也獻帝末荒廢魏黃初二年乃于漢茲氏縣置
西河郡即今州理是也晉惠帝時為劉元海所攻破郡
遂廢後魏孝文帝太和八年復于茲氏舊城置西河郡
屬吐京鎮按吐京鎮今隰州西北九十里石樓縣是也
十二年改吐京鎮為汾州西河郡仍屬焉明帝時為胡
賊所破因北移西河郡理平陽界高齊又于此城置南

朔州周武帝廢南朔州宣帝于此置汾州隋大業三年
廢汾州還于隰城縣置西河郡皇朝初改為浩州武德
三年又改浩州為汾州

州境

東西一百六十四里
南北二百八十五里

八到

西南至上都一千九十里
東南至東都九百三十里

東南至潞州四百四十里

東南至沁州二百六十里

西南至隰州二百七十里

西北至石州一百六十里

東北至太原府一百七十里

貢賦

開元貢賦

龍鬚蓆布麻

石膏菽粟

管縣五

西河 孝義 介休 靈石 平遙

西河縣

望郭下

開元戶一萬二千三百七十五鄉二十五
案自此以後各縣及靈州並缺元和戶鄉數

本漢茲氏縣也曹魏于此置西河郡晉改為國仍改茲氏縣為隰城縣上元元年改為西河縣今城內有晉西河王斌碑文字殘缺

謁泉山在縣東北四十里一名隱泉山上有石室去地五十餘丈頂上平地可十頃相傳以為子夏石室

比干山在縣北一百一十里

文湖一名西河泊在縣東十里多蒲魚之利

八門城在縣北十五里劉元海遣將喬嵩攻西河築營自固營有八門因名

卜商祠在縣北四十里

孝義縣

縣西北至州三十五里

開元戶一萬六百八十五

案鄉數傳寫缺

本漢茲氏縣地曹魏移西河郡中陽縣于今理永嘉後
省入隰城後魏又分隰城于今靈石縣東三十里置永
安縣貞觀元年以縣名與涪州縣名同改為孝義縣因
縣人郭興有孝義故以名焉

勝水在縣南一里

團城在縣西北十八里後魏築以防稽胡其城紆曲故
名團城

魏文侯墳在縣西五里

段干木墓在縣東北二十五里

介休縣

望西北至州六十五里

開元戶一萬一千三百八十三

鄉二十二

本秦漢之舊邑在介山西因名之後魏明帝時為胡兵所破至孝靜帝更修築遷朔州軍人鎮之因立為南朔州但領軍人不領郡縣其介休縣仍屬汾州高齊省介休入永安縣周武帝省南朔州復置介休縣宣帝改介

休為平昌縣隋開皇末又改平昌為介休縣義寧元年
于縣置介休郡武德元年改郡為介州貞觀元年廢介
州以縣屬汾州

介山在縣西南二十里

雀鼠谷在縣西十二里

汾水在縣北十二里

鄆城泊在縣東北二十六里周禮并州之藪曰昭餘祁
即鄆城泊是也

郭林宗墳在縣東三里周武帝時除天下碑惟林宗碑
詔特留

靈石縣 上北至州一百二十里

開元戶三千七百三十一 鄉八

本漢介休縣地隋開皇十年因巡幸開道得瑞石遂于
谷口置縣因名靈石皇朝因之

介山在縣東四十二里

汾河在縣北十步深一丈闊三丈

賈胡堡在縣南三十五里義寧元年義師次于霍邑隋將宋金剛拒不得進屯軍此堡有霍山神見靈事已具于霍邑縣敘事

平遙縣

望西北至州八十里

開元戶一萬八千九百七

鄉三十八

本漢平陶縣地屬太原郡後魏隸西河郡魏以太武帝名燾改平陶為平遙隋屬西河郡義寧元年于介休縣置介休郡以平遙縣屬焉武德元年于此置介州縣屬

不改貞觀元年省州縣屬汾州

麓臺在縣東南五十二里

京陵故縣在縣東七里漢京陵縣晉九原地也禮記注
曰九原晉卿大夫之墓地也

中都故城在縣西十二里屬太原郡漢文帝為代王都
于此

沁州 陽城中下

開元戶六千五百八十 鄉一十三
元和戶二千二百二十 鄉一十三

禹貢冀州之域春秋時其地屬晉戰國屬韓在秦為上黨郡地今州即漢上黨郡之穀遠縣地也隋開皇十六年于此置沁州因州東沁水為名大業二年省沁州武德元年重置

州境

東西一百五十里
南北二百六十四里

八到

西南至上都一千二十里
東南至東都六百三十里

西南至晉州二百九十里

西至晉州霍邑縣一百五十里

西北至汾州二百六十里

東北至太原府三百四十里

東南至潞州三百三十里

貢賦

開元貢賦

龍鬚蓆
布麻

管縣三

沁源 和川 綿上

沁源縣

中郭下

開元戶二千二百五十四 鄉五

本漢穀遠縣地舊在今縣南百五十里孤遠故城是也
語音訛轉故以穀為孤耳後魏莊帝于今理置沁源縣

因沁水為名也屬義寧郡隋開皇三年罷郡置縣屬晉州十六年置沁州縣屬焉

霍山一名太岳在縣西七十八里

沁水自綿上縣界流入在縣東一里

和川縣 中下北至州七十里

開元戶二千八十 鄉四

本漢穀遠縣地後魏莊帝于今縣南九里置義寧縣屬義寧郡隋開皇三年罷郡改屬晉州十六年置沁州縣

屬焉十八年改為和川縣大業三年省武德元年重置
烏嶺在縣西十六里

沁水在縣東十里

棄波水在縣東八十步

冀缺墓在縣南三十六里

綿上縣 中下南至州七十六里

開元戶一千八百一十五 鄉四

本漢穀遠縣地隋開皇十六年置綿上縣屬沁州以縣

西界有綿上地因以為名

羊頭山一名謁戾山在縣東北五十里沁水所出

沁水一名少水出縣東南二十四里覆甌山左傳曰齊侯伐晉封少水為京觀也

霍山在縣西南八十里

儀州 樂平下

開元戶七千九百九十五 鄉一十九
元和戶一千六百五十一 鄉二十

禹貢冀州之域春秋時其地屬晉戰國屬韓秦為上黨

郡地今州理即漢上黨郡之涅氏縣地也後漢于此置陽阿縣屬上黨郡晉改為轅陽屬樂平郡後魏明帝改轅陽為遼陽隋開皇十六年于遼陽故城置遼山縣屬并州即今州理是也武德三年于此置遼州八年改為箕州因遼山縣界箕山為名先天元年以與玄宗諱同聲改為儀州因州東夷儀嶺為名也

州境

東西二百五十里
南北一百九十五里

八到

西南至上都一千六百四十里
西南至東都七百八十里

正東徽南至洛州三百六十里
南至潞州三百一十里

西至太原府祁縣三百里

西北至太原府三百四十五里

北至太原府樂平縣二百六十里

貢賦

開元貢人參三十兩
案開元賦傳寫缺

管縣四

遼山 榆社 平城 和順

遼山縣

中郭下

開元戶二千一百九十 鄉五

本漢涅氏縣地後漢于此置陽阿縣屬上黨郡晉改為
輟陽縣屬樂平郡後魏明帝改為遼陽隋開皇十六年
改置遼山縣因縣西北遼山為名皇朝因之

箕山在縣東四十五里上有許由冢按司馬遷傳曰余
登箕山上有許由冢則在今洛州陽城縣不當在此
五指山在縣東五十里

祝融祠在縣北二里

榆社縣

中東至州一百一十里

開元戶二千七百一十 鄉六

本漢涅氏縣地晉于今縣西北三十五里置武鄉縣屬
上黨郡石趙時改屬武鄉郡隋開皇十六年于此置榆
社縣屬韓州

今潞州襄垣
縣理是也

因縣西北榆社故城為名大

業二年省義寧二年又置武德三年于縣置榆州縣屬
焉六年廢榆州以縣屬遼州後屬儀州縣城故武鄉城
也石勒時築前趙錄曰石勒上黨武鄉人僭號後還令
曰武鄉吾之豐沛其復之三世

石勒漚麻池在縣北三十里即勒微時與李陽所爭處
今枯涸纔有處所

平城縣

下東南至州九十里

開元戶九百五十四

鄉三

本漢涅氏縣也晉置武鄉縣地屬焉隋開皇十六年于
趙簡子所立平都故城置平城縣屬遼州大業三年改
屬并州武德三年改屬榆州六年省榆州改屬遼州貞
觀八年改屬箕州先天元年改屬儀州

八賦嶺在縣西南三十里武鄉水所出

和順縣

中南至州八十五里

開元戶二千一百二十九

鄉五

本漢沾縣地即韓之關與邑也史記曰秦伐韓關與趙
惠文王使趙奢救之大破秦師即此地也隋開皇十年
于今理置和順縣屬并州因縣東北和順故城以為名
九京山在縣西十里

清漳水在縣北

嵐州樓煩下

開元戶一萬七百二十六
元和戶六千三百八十二

鄉二十二
鄉三十三

禹貢冀州之域周并州之域春秋屬晉晉滅後為胡樓煩王所居趙武靈王破以為縣秦為太原郡地在漢即太原郡之汾陽縣地也漢末大亂匈奴侵邊自定襄以西盡雲中雁門西河之間遂空建安中曹公糾率散亡立新興郡晉末陷劉元海後魏于今理置嵐州因州西岢嵐山以為名也隋大業四年于靜樂縣界置樓煩

郡因漢樓煩縣為名隋亂陷賊武德四年平劉武周置
東會州六年省東會州重置嵐州天寶元年改為樓煩
郡乾元元年復為嵐州

州境

東西三百一十里

南北二百七十八里

八到

南至上都取太原路一千五百八十里取石隰路
一千三百七十五里

東南至東都一千二百一十里
東至忻州二百四十里

東南至太原府三百二十里
南至石州二百四十里

西至黃河一百八十里河上有合河關從關西至
麟州一百二十里

東北至代州三百里
東北至朔州三百七十四里

貢賦

開元貢 熊皮 石蜜
賦 布 麻

管縣四

宜芳 靜樂 合河 嵐谷

宜芳縣

上郭下

開元戶五千五百二十四 鄉十一

本漢汾陽縣地屬太原郡後魏于此置岢嵐縣隋開皇十八年改為汾源縣大業四年改汾源為靜樂縣八年

分靜樂置嵐城縣屬樓煩郡武德四年改為宜芳縣

岢嵐山在縣北九十八里高二千餘丈西北與雪山相接

岢嵐鎮在縣西北九十八里

秀容故城在縣南三十里劉元海感神而生姿容秀美因以為名也

靜樂縣 上西至州四十五里

開元戶三千四百八十七 鄉七

本漢汾陽地城內有堆阜三俗名三堆城隋開皇三年
自今宜芳縣北移寄嵐縣于三堆城十八年改為汾源
縣大業二年改為靜樂縣武德四年于縣置北管州因
管涔山為名六年省縣屬嵐州

管涔山在縣北百三十里汾水源出焉初劉曜隱于此
山山神使二童子獻劍于曜曰管涔山王使謁趙皇帝
獻劍

伏戎城在縣北八十里隋樓煩郡所理也

隋汾陽故宮在縣北百二十里

樓煩關在縣北百五十里

天池在縣北燕京山上周迴八里陽旱不耗陰霖不溢
故老言嘗有人乘車風飄墮池有人獲車輪于桑乾泉
後魏孝文帝以金珠串魚七頭放此池後亦于桑乾泉
得之隋煬帝嘗于池南置宮每夜風雨吹破宮竟不成
今池側有祠謂之天池祠

合河縣

中東至州一百八十里

開元戶一千八百五十九 鄉四

本漢汾陽縣地後魏于蔚汾谷置蔚汾縣屬神武郡隋
開皇三年罷郡縣屬石州大業二年改為臨泉縣四年
屬樓煩郡武德七年改為臨津縣屬嵐州貞觀元年改
為合河縣以城下有蔚汾水西與黃河合故曰合河
黃河在縣西二里

合河關在縣北三十五里

蔚汾關在縣東七十里

隋長城起縣北四十里東經幽州延袤千餘里開皇十六年因古蹟修築

嵐谷縣

中南至州九十里

開元戶四千六百五十七

鄉九

隋大業三年置奇嵐鎮壓草城川賊路長安三年于此

置嵐谷縣景龍年廢

案新舊唐書並作神龍二年廢

開元十二年重置

因取嵐谷為名

石州

昌化下

開元戶九千二百六十二
元和戶五千二十

鄉三十二
鄉三十二

禹貢冀州之域虞及周屬并州春秋時屬趙亦為白狄之地今步落稽其胄也在秦為西河郡之離石縣靈帝末黃巾大亂百姓南奔其郡遂廢魏黃初三年復置離石縣晉惠帝末劉元海起于河西攻陷郡縣其離石又沒于賊石勒時改為永石郡後魏明帝改為離石郡高齊文宣帝于城內置西汾州周武帝改為石州隋大業二年又為離石郡武德元年改為石州五年置總管七

年改為都督貞觀六年復為石州

州境

東西一百九十里
南北三百三里

八到

西南至上都一千二百五十里
東南至東都一千九十里

東南至汾州一百六十里

正南微東至隰州二百五十里

西渡河至綏州二百三十里

北至嵐州二百五十里

貢賦

開元貢 胡女布 龍鬚席 麝香 蜜蠟
賦 布 麻

管縣五

離石 平夷 定胡 臨泉 方山

離石縣

中郭下

開元戶二千七百七十三

鄉五

本漢舊縣也屬西河郡縣東北有離石水因取名焉漢末荒廢魏黃初復置後陷劉元海石勒改為永石郡高齊文宣帝于此置昌化縣屬懷政郡後周復為離石屬石州隋氏不改皇朝因之

離石山今名赤洪嶺在縣西五十步高歡大破爾朱兆于赤洪嶺蓋此處也

廬城在縣東二十里晉并州刺史劉琨所築以攻劉曜

平夷縣 中東至州五十一里

開元戶一千五百七十一

鄉四

本漢離石縣地周宣帝割縣西五十一里置平夷縣屬石州隋氏不改皇朝因之

黃河西去縣四十五里

寧鄉水在縣西南一百五十步

定胡縣 中東至州九十五里

開元戶二千六百九 鄉五

本漢離石縣地周宣帝大象元年于此置定胡縣隋因之武德三年于縣置西定州貞觀二年廢州置孟門縣七年廢縣為孟門鎮八年廢鎮復為定胡縣

黃河去縣西二百步

孟門關在縣西一百步河東岸

臨泉縣 中下南至州一百七十里

開元戶一千五百九十六 鄉五

本漢離石縣地周大象元年于此置烏突郡烏突縣隋
開皇元年改烏突郡為太和郡烏突縣為太和縣三年
廢郡以太和縣屬石州武德三年改太和縣為臨泉水
臨泉水在縣北一百步縣因此水為名

黃河在縣北二十里

方山縣 中南至州九十里


開元戶一千三百五十三 鄉四

本漢離石縣地高齊文宣帝于此縣北六十八里置良

泉縣屬離石郡隋大業三年移就今縣南三十五里方
山置故名方山貞觀十一年移于今理

赤洪水在縣南五十里

三角戍在縣北七十三里



元和郡縣志卷十七

欽定四庫全書

史部
元和郡縣志卷十八

詳校官編修臣曹 城

檢討臣德生覆勘

總校官庶吉士臣倉聖脉

校對官中書臣鮑之鍾

謄錄監生臣范廷驛

欽定四庫全書

元和郡縣志卷十八

唐 李吉甫 撰

河東道五

忻州 定襄下

開元戶一萬四千三百三十八
元和戶四千二百四

鄉二十八
鄉二十九

古并州之域春秋時為晉地戰國為趙地秦為太原郡
地今州即漢太原郡之陽曲縣也按漢陽曲縣在今州

東四十五里定襄縣理是也後漢末大亂匈奴侵邊自定襄以西盡雲中雁門之間遂空曹公立新興郡以安集之理九原即今州是也後魏宣武帝又于今州西北十八里故州城移肆州理此因肆廬川為名也隋開皇十八年改置忻州因州界忻川口為名也大業二年省忻州義旗初又置新興郡武德元年廢郡復置忻州二年陷劉武周四年武周平依舊置忻州

州境

東西一百四十五里
南北八十六里

八到

西南至上都一千四百四十里
南至東都一千七十里

南至太原府一百八十里

西至嵐州二百四十里

東北至代州一百六十里

貢賦

開元貢麝香扇十五枝
賦布麻

管縣二

秀容 定襄

秀容縣

上郭下

開元戶七千一百三十八 鄉十一

本漢陽曲縣地屬太原郡後漢末于此置九原縣屬新興郡後魏莊帝于今縣東十里置平寇縣隋開皇十八年于此置忻州又于今縣西北五十里秀容故城移後魏明元所置秀容縣于今理屬忻州國朝因之

滹沱水在縣東三十二里

定襄縣

上東至州四十五里

開元戶五千五百三十二

鄉十七

本漢陽曲縣屬太原郡黃河千里一曲縣當其陽故曰

陽曲後魏末移陽曲縣于太原界仍于此城置定襄縣
屬新興郡高齊省武成帝移平寇縣于此隋開皇十年
移平寇于崞城今代州崞縣是也武德四年分秀容縣
于漢陽曲城重置定襄縣

聖阜今名聖人山在縣東北二十里石上手足跡猶存
潯沔水西自秀容縣界流入

代州 雁門中都督府

開元戶一萬五千七十七
元和戶二千一百二十

鄉二十八
鄉四十

古并州之域春秋時為晉地戰國時屬趙史記曰趙襄子與韓魏共滅智伯分晉地則趙有代勾注之北今按勾注在州西北三十五里雁門縣界西陁山是也秦置三十六郡雁門是其一焉漢因之後漢末匈奴侵邊其地荒廢周宣帝大象元年自九原城移肆州于今理隋開皇五年改肆州為代州大業三年改為雁門郡隋氏喪亂陷于寇境武德四年平代置代州都督府

州境

東西三百二十里
南北三百二十八里

八到

西南至上都一千六百里
南至東都一千二百三十里

東南取崩石嶺至恒州五百四十里
西至嵐州三百里

北至朔州一百二十里
東北至蔚州四百里

貢賦

開元貢 鵬翎五具 麝香
賦 布 麻

管縣五

雁門 繁峙 五臺 唐林 崞

雁門縣

上郭下

開元戶五千二百二十一 鄉十

本漢廣武縣地屬太原郡後漢改屬雁門郡隋開皇三年罷郡縣仍屬肆州後改肆州為代州縣屬不改十八年改廣武縣為雁門縣蓋避太子之諱也國朝因之

夏屋山在縣東北三十五里史記曰趙襄子北登夏屋

誘代王使廚人操銅料擊殺之遂有代地

勾注山一名西陘山在縣西北三十里晉咸寧元年勾注碑曰蓋北方之險有盧龍飛狐勾注為之首天下之阻所以分別内外也漢高祖欲伐匈奴不從婁敬之說

械繫于廣武遂踰勾注困于平城謂此地也

河神祠在縣南開元九年并州長史張說奏置

繁時縣

中西至州六十里

開元戶一千五百九十三

鄉五

本漢舊縣屬雁門郡漢末匈奴侵寇舊縣荒廢晉又置
繁時縣周省隋開皇十八年重置于今縣東六十里大
堡戍大業十二年移于武州城聖歷二年以縣在平川
難于固守遂東移于今理其城三面枕澗東接峻嶓極

為險固

秦戲山一名武夫山在縣東南九十里潄沱水出焉

五臺縣

中西北至州一百二十里

開元戶二千一百六十五 鄉五

本漢慮虢縣

慮音閭
虢音夷

屬太原郡因慮虢水為名也晉省

後魏孝文帝復置即今縣理是也屬新興郡高齊改屬

雁門郡隋大業二年改為五臺縣因山為名也

五臺山在縣東北百四十里道經以為紫府山內經以

為清涼山

慮虎水在縣北十五里

唐林縣

中東北至州一百一十里

本漢廣武縣地證聖元年分五臺崢二縣置武延縣唐
隆元年改為唐林縣

潯沱水在縣東

沙河在縣南二里

崢縣

中東北至州五十里

開元戶二千七百四十八

鄉五

本漢舊縣因山為名屬雁門郡漢末荒廢晉初又置魏改為崞山縣後魏宣武帝移雁門郡理此隋開皇十年移平寇縣于此屬代州大業二年改為崞縣
溥施水在縣東二百步

蔚州

興唐下

開元戶四千八百八十七
元和戶一千五百六十三

鄉十一
鄉十二

禹貢冀州之域虞及周屬并州周禮并州川曰漚夷浸

曰涑易今漚夷在靈丘涑易在飛狐皆在州境春秋時
其地屬晉戰國時屬趙襄子殺代王有其地後武靈王
置雲中雁門代郡秦亦為代郡漢元年項羽徙趙王歇
為代王二年陳餘迎歇還趙歇又立餘為代王三年韓
信斬陳餘置代郡領縣十八東魏孝靜帝又于此置北
靈丘郡周宣帝于今理置蔚州隋大業三年罷州置雁
門郡武德四年平劉武周重置蔚州

州境

案州境里
數傳寫缺

八到

西南至上都二千里

南至東都一千六百三十里

東至恒州取方秦嶺路四百九十里

東南至定州取轆轤山路四百九十里

東至易州山路三百六十里

西南至代州四百里

西至朔州二百八十里

北至天成軍一百八十里

東北至媯州界孔嶺關一百里從關至媯州一百

五十里

貢賦

開元貢

熊皮 豹皮

賦

布 麻

管縣三

興唐 靈丘 飛狐

興唐縣

下郭下

開元戶一千四百七十二

鄉四

本靈丘縣也開元十二年于州東北一百三十里橫野
軍子城南置安邊縣屬蔚州天寶元年改為安邊郡仍
自靈丘移州理于安邊城至德二年改為興唐郡仍改
安邊縣為興唐縣

倒刺山在縣東七十里亦號雪山俗傳靈仙所居與五
臺山略等

溫夷河亦曰瓠瓠河上槽狹下流闊有似瓠瓠因名

大韭多生于山及平野魏孝文所種以濟軍需後沃壤處皆長三尺葉廣于馬蘭但味少短耳

橫野軍置在州城內

靈丘縣

中下東北至州一百三十里

開元戶二千四百二十一

鄉五

本漢舊縣屬代郡後魏省東魏孝靜帝重置屬靈丘郡隋開皇三年罷郡縣屬蔚州大業二年省蔚州改屬代

州隋末陷賊武德二年又置靈丘縣屬蔚州

太白山在縣南十里山有鍾乳穴其深不測仰望穴中乳如懸穗焉

石銘陁嶺在縣西北八十里上有石銘題言冀州北界故謂石銘陁

隘門山亦名隘口在縣東南十五里壁立直上層崖刺天有石道極險陁後魏明元帝置義倉之所

漚夷水一名漚水出縣西北高是山周禮曰并州其川

漚夷謂此也

茲水出縣西枝迴山懸河五丈湍激之聲響動山谷樵
棧之士咸由此度巨木淪渚久乃方出或落崖石無不
粉碎也土地記云枝迴嶺與高是山連麓接勢

開皇長城西自繁時縣經縣北七十里東入飛狐縣界
趙武靈王墓在縣東三十里

飛狐縣 下西至州一百五十里

開元戶九百九十二 鄉三

本漢廣昌縣地屬代郡後漢屬中山國晉又屬代郡隋開皇三年改屬蔚州仁壽元年改為飛狐縣因縣北飛狐口為名也隋末陷賊武德六年重置寄理今易州遂城縣界遙屬蔚州貞觀五年移還今所

磨笄山在縣東北一百五十里趙襄子姊為代王夫人襄子既殺代王迎其姊夫人曰以弟慢夫非仁也以夫怨弟非義也磨笄自刎百姓閔之為立祠

倒刺山在縣東北百二十里出佳大黃

飛狐道自縣北入媯州懷戎縣界即古飛狐口也酈食其說漢王曰杜白馬之津塞飛狐之口此言皆一方之阨也又劉琨自代出飛狐口奔于安次亦謂此道也

三河冶舊置鑪鑄錢至德以後廢元和七年中書侍郎平章事李吉甫奏臣訪聞飛狐縣三河冶銅山約數十里銅鑛至多去飛狐錢坊二十五里兩處同用拒馬河水以水解銷銅北方諸處鑄錢人工絕省所以平日三河冶置四十鑪鑄錢舊跡並存事堪覆實今但得錢本

令本道應接人夫三年以來其勢即立救河東困竭之
弊成易定援接之形制置一成久長獲利詔從之其年
六月起工至十月置五鑪鑄錢每歲鑄成一萬八千貫
時朝廷新收易定河東道久用鐵錢人不堪弊至是俱
受利焉

朔州 馬邑下

開元戶六千三十 鄉十三
元和戶七百二十九 鄉十六

禹貢冀州之域虞及周為并州之地春秋時為北狄地

戰國時屬趙秦為雁門郡地在漢即雁門郡之馬邑縣也史記曰匈奴圍韓王信于馬邑信降匈奴按馬邑即今州理是也漢末大亂郡遂荒廢建安中曹公又立馬邑縣屬新興郡晉改屬雁門郡晉亂其地為猗盧所據劉琨表盧為大單于封代公徙馬邑後魏都代地屬畿內孝文帝遷洛之後又于定襄故城置朔州葛榮之亂州郡又廢高齊文宣帝又于馬邑城置朔州即今理是也武成帝置北道行臺周武帝置朔州總管隋開皇罷

總管大業三年罷州為馬邑郡皇朝改為朔州

州境

東西四百八十里
南北九十七里

八到

西南至上都一千七百二十里
南至東都一千三百五十里

東至蔚州三百八十里

西南至嵐州三百七十四里

北至單于大都護府三百五十里

東北至雲州三百四十里

貢賦

開元貢 白雕翎五具

管縣二

鄯陽 馬邑

鄆陽縣 中郭下

開元戶三千六百五十八

鄉十八

本漢馬邑縣屬雁門郡漢末荒廢建安中又置屬新興郡晉又屬雁門郡晉末又廢高齊于此置招遠縣屬郡不改隋開皇三年罷郡改屬朔州大業元年改為鄆陽縣

勾注山在縣東八十里

河水在縣西三百里

州城本漢馬邑城也昔秦人築城于武周塞以備胡城將成而崩者數矣有馬馳走周旋反覆父老異之因依而築城乃不崩遂名馬邑

馬邑縣

中西至州三十里

開元戶二千三百八十

鄉五

本鄯陽縣地開元五年分鄯陽縣于州東三十里大同軍城內置馬邑縣建中年間河中節度使馬燧權移州于馬邑縣焉

桑乾河在縣東三十里

雲州 雲中下

開元戶三千一百六十九 鄉七
案元和戶鄉數傳寫缺

禹貢冀州之域虞及周屬并州春秋時為北狄地戰國時其地屬趙其後武靈王自代至高闕為塞而置雲中雁門代郡今州即秦雁門郡地在漢雁門郡之平城縣也史記曰漢七年韓王信亡走匈奴上自將逐之遂至平城為匈奴所圍用陳平秘計得出是也漢末大亂匈

奴侵邊自定襄以西雲中雁門西河遂空曹公鳩集荒
散又立平城縣屬新興郡晉又改屬雁門晉亂劉琨表
封猗盧為代王都平城後魏道武帝又于此建都東至
上谷軍都關西至河南至中山隘門塞北至五原地方
千里以為甸服孝文帝改為司州牧置代尹孝文帝遷
都洛邑改置恒州孝昌之際亂離尤甚恒代之北盡為
丘墟高齊文宣帝天保七年置恒安鎮徙豪傑三千家
以實之今名東州城其年廢鎮又置恒州周武平齊州

郡並廢又于其所置恒安鎮屬朔州自州迄隋仍為鎮也隋亂陷賊武德四年平劉武周置北恒州七年廢貞觀十四年自朔州北界定襄城移雲州及定襄縣于此後為默啜所破移百姓于朔州開元十八年復置雲州及雲中縣

州境

東西一百七十七里
南北四百九十里

八到

西南至上都一千九百六十里
南至東都一千五百九十里

東至幽州七百里

東至清塞城一百二十里

又東至天城軍六十里
又東至納降守捉九十里與幽州分界

西至靜邊軍一百八十里
西南至太原府七百里

貢賦

開元貢 鵬翎五具
賦 布 麻

管縣一

雲中

雲中縣

中

本漢平城縣屬雁門郡漢末大亂其地遂空魏武帝又
立平城縣屬新興郡晉改屬雁門郡後魏于此建都屬

代尹孝文帝改代尹為恒州縣屬不改隋為雲內縣屬
馬邑郡貞觀十四年朔州北界定襄城移于此後為默
啜所破移百姓至朔州開元十八年改置雲中縣屬雲
州

白登山在縣東北三十里

火山在縣西五里山有火井深不見底以草投之則烟
騰火發有火井祠

紇真山在縣東三十里虜語紇真漢言三十里其山夏

積霜雪

單于臺在縣西北四十餘里漢武帝元封元年勒兵十八萬騎出長城北登單于臺即此也

元和郡縣志卷十八